

आकाशवाणी रायपुर (छत्तीसगढ़)  
प्रादेशिक समाचार (छत्तीसगढ़ी)

1810 मंगलवार

13.08.2024

प्रमुख समाचार –

- 1— 'हर घर तिरंगा' अभियान के तहत राज्यभर म कई ठिन कारीकरम करे जात हे।
- 2— केन्द्रीय पर्यावरण मंत्री भूपेन्द्र यादव ह देस म हाथी मनके प्रति सहानुभूति के भावना ल बढ़ावा दे अउ मनखे अउ हाथी मनके बीच होवत हादसा ल रोके म जोर दीन।
- 3— मुख्यमंत्री विष्णुदेव साय ह आज ले 'एक पेड़ महतारी के नाव' अभियान के सुरुवात करीन।

हर घर तिरंगा

'हर घर तिरंगा' अभियान के तहत राज्यभर म कई ठिन कारीकरम करे जात हे। ए दरान लोगन मन ल अपन-अपन घर म तिरंगा झंडा फहराय बर प्रेरित करे जात हे। इही कड़ी म श्रम मंत्री लखनलाल देवांगन के मौजूदगी म कोरबा के घंटाघर म तिरंगा यात्रा निकाले गीस। श्री देवांगन ह ए यात्रा ल हरियर झंडा देखाके रवाना करीन। ए यात्रा ल सहर के कई ठिन रद्दा ले घुमईन अउ एसईसीएल फुटबॉल मैदान म खतम करे गीस।

ओति, बेमेतरा जिला म जिला स्तरीय तिरंगा यात्रा म जिला के कर्मचारी अउ अधिकारी मन ह सामिल होइन। ए तिरंगा यात्रा म कैबिनेट मंत्री दयालदास बघेल के संग बड़ संख्या म लोगन मन ह सामिल होइन।

ऐति, जांजगीर-चांपा म निकाले गे तिरंगा रैली म सांसद कमलेश जांगड़े अउ पूर्व नेता प्रतिपक्ष नारायण चंदेल ह सामिल होइन।

हाथी दिवस-कार्यक्रम

केन्द्रीय पर्यावरण, वन अउ जलवायु परिवर्तन मंत्री भूपेन्द्र यादव ह देस म हाथी मनके प्रति सहानुभूति के भावना ल बढ़ावा दे अउ मनखे अउ हाथी मनके बीच होवत हादसा ल रोके म जोर दीन। श्री यादव ह रईपुर म विश्व हाथी दिवस के मउका म राखे गे एक ठिन कारीकरम के सुरुवात करत किहीन कि हाथी मनके संरक्षण और मनखे मनके भलई ल ध्यान म राखके हम जम्मां इन ल मिलके काम करना चाही।

ए मउका म मुख्यमंत्री विष्णुदेव साय ह किहीन कि राज्य सरकार डहार ले हाथी अउ मनखे मनके बीच म होवत हादसा ल रोके बर ठोस कदम उठाही। ओमन किहीन कि हाथी मनके जानकारी दे खातिर सरगुजा ले "हमर हाथी-हमर गोठ" रेडियो कार्यक्रम के प्रसारण घलो करे जाथे। मुख्यमंत्री ह किहीन कि छत्तीसगढ़ म हाथी मनके सुरक्षा ल ध्यान म राखत बादलखोल, तमोरपिंगला अउ एलीफेंट रिजर्व बनाय गेहे।

ई-ऑक्शन प्रणाली

मुख्यमंत्री विष्णुदेव साय अउ केन्द्रीय वन मंत्री ह नवा रईपुर के अरण्य भवन म राज्य म इलेक्ट्रॉनिक ऑक्शन प्रणाली के शुरुआत करीन। ए मउका म वन विभाग डहार ले दू करोड़ रूपिया के लागत ले बनाय गे 'दण्डकारण्य' के सुरुवात करीन। ए ऑडिटरियम म आतंरिक साज-सज्जा, लाइट, साउंड सिस्टम, एलईडी स्क्रीन जइसन सुविधा के संग एक सौ चालीस इन मनखे मनके बइठे के व्यवस्था करे गेहे।

### पोषण आहार नाश्ता

राज्य के श्रम मंत्री लखनलाल देवांगन ह कोरबा जिला के जमनीपाली के सरकारी प्राथमिक अउ माध्यमिक स्कूल म पोषण आहार नाश्ता कारीकरम के सुरुवात करीन। ए मउका म श्री देवांगन ह किहीन कि डी.एम.एफ. के राशि ले कोरबा नगरीय क्षेत्र अउ पोड़ी उपरोड़ा विकासखंड म सरकारी प्राथमिक अउ पूर्व माध्यमिक शाला के लइका मन ल स्कूल शुरू होय के पहिली पौष्टिक नाश्ता दे जाही, जेखर ले लइका मन ह कुपोषित होय ले बाच जही। ओमन किहीन कि ए योजना ल राज्य के जम्मा जिला म जल्दीच सुरु करे जाही।

### नई शिक्षा नीति-कार्यशाला

प्रदेश के स्कूल मन म नवा शिक्षा नीति के तहत पाठ्य-पुस्तक मन म जरूरी बदलाव लाय खातिर राज्य स्तरीय पाठ्य पुस्तक लेखन कार्यशाला के कारीकरम करे जात हे। ए कार्यशाला म अवइया बछर ले पहिली ले तीसरी अउ छठवीं कक्षा के पाठ्य पुस्तक मन ल बदले के योजना म विचार करे जात हे। ए दउरान राज्य शैक्षिक अनुसंधान अउ प्रशिक्षण परिषद डहार ले रईपुर म दू दिन के कार्यशाला राखे गीस। ए मउका म स्कूल शिक्षा सचिव सिद्धार्थ कोमल सिंह परदेशी ह किहीन कि प्रारंभिक कक्षा म विद्यार्थी मन ल उंखर स्थानीय भासा म पढ़ाय जाना चाही।

### जायसवाल-रेल मंत्री मुलाकात

प्रदेश के स्वास्थ्य मंत्री श्यामबिहारी जायसवाल ह आज दिल्ली प्रवास के दउरान रेल मंत्री अश्वनी वैष्णव ले भेंट करीन। ए दउरान श्री जायसवाल ह केन्द्रीय मंत्री ल चिरमिरी-नागपुर हाल्ट नवा रेललाइन बनाय बर राज्य सरकार डहार ले रासि देके जानकारी दीन। उहें, ओमन बिलासपुर-चिरमिरी-बिलासपुर रेलगाड़ी ल दुरुग रेलवे स्टेशन तक या गोंदिया रेलवे तक बढ़ाय के मांग करीन। उहें, श्री जायसवाल ह शहडोल-नागपुर ट्रेन ल चिरमिरी ले चलाय जाय के मांग राखीन, जेमा रेल मंत्री ह जायसवाल ल आशा देवावत किहीन कि ए जम्मा मांग उपर सही निर्णय ले जाही।

### लोक निर्माण विभाग-निर्देश

लोक निर्माण विभाग डहार ले राज्य के नंदियां मन म बने पुलिया के दूनो मुड़ा म अस्थायी बैरियर, रिफ्लेक्टर अउ साइन बोर्ड लगाय के निरदेस दीन, जेखर ले बाढ़ या नंदियां म कतका पानी चलत हे, तेखर पता लगाय जा सकय। ए संबंध म लोक निर्माण विभाग के प्रमुख अभियंता ह सुरक्षित यातायात बर जम्मा परिक्षेत्र मनके मुख्य अभियंता, मंडल मनके अधीक्षण अभियंता अउ संभागीय कार्यपालन अभियंता मन ल परिपत्र जारी कर देहे।

### जनसमस्या निवारण शिविर

राज्य के जम्मा नगरीय निकाय मन म सत्ताईस जुलाई ले दस अगस्त तक राखे गे "जनसमस्या निवारण शिविर" म करीबन एक लाख बारह हजार अरजी मिले हवय, जेमा ले करीबन पैंतालीस हजार अरजी मनके मउकाच म निराकरण करे गीस। उहें, दूसर विभाग के आवेदन मन ल संबंधित विभाग मन ल भेज दे गेहे। अरजी मनके परीक्षण करके निराकरण करे जाही।

### ‘एक पेड़ मां के नाम’

केन्द्रीय पर्यावरण अउ जलवायु परितर्वन मंत्रालय के विशेष सचिव अउ वन विभाग के महानिदेशक जितेन्द्र कुमार ह छत्तीसगढ़ प्रवास के दउरान आज नवा रईपुर के जंगल सफारी म ‘एक पेड़ मां के नाम’ अभियान के तहत मउहा पेड़ लगईन। ए दउरान ओमन स्कूल म पढ़ईया लइका अउ वन विभाग के कर्मचारी मन ल मोमेंटो भेंट करीन।

उहें, मुख्यमंत्री विष्णुदेव साय ह आज ले ‘एक पेड़ मां के नाम’ अभियान जइसन ‘एक पेड़ महतारी के नाव’ अभियान के सुरुवात करीन। मुख्यमंत्री ह ‘एक पेड़ महतारी के नाव’ रथ ल हरियर झंडा देखाके रवाना करीन।

### निर्माण श्रमिक-राशि

राज्य के श्रम मंत्री लखनलाल देवांगन ह प्रदेश के तैंतीस हजार ले जादा निर्माण मजदूर अउ उंखर परिवार वाले मन बर रक्षाबंधन के मउका म करीबन साढ़े चौदह करोड़ रूपिया के राशि मंजूर करे हे। ए राशि ल श्रम विभाग डहार ले मजदूर अउ उंखर परिवार वाले मन बर चलाय जात योजना के तहत डीबीटी के माध्यम ले दे जाही। ए राशि ल छत्तीसगढ़ भवन निर्माण अउ अन्य सन्निर्माण कर्मकार कल्याण मंडल डहार ले मंजूर करे गेहे।

### ज्योति पाल-उपलब्धि

राज्य के गौरेला-पेण्ड्रा-मरवाही जिला के कोरजा गांव के ज्योति पाल ल नई दिल्ली म स्वतंत्रता दिवस समारोह म विशिष्ट अतिथि के रूप म नेवता मिले हवय। खबर के मुताबिक जिला के राष्ट्रीय ग्रामीण आजीविका मिशन-बिहान समिति के सदस्य मन ल पहिली घांव ए सम्मान मिले हवय। ज्योति पाल ह आज रईपुर हवाई अड्डा ले नई दिल्ली बर रवाना हगे हे।

### मौसम

मौसम विभाग के मुताबिक राज्य म काली ले कई ठिन जघा म गरज-चमक के संग हल्का बरसा होय के संभावना हे। उहें, कोनों-कोनों जघा म बिजली गिरे के संगेसंग उत्तरी छत्तीसगढ़ म भारी वर्षा होय के चेतावनी दे गेहे।

### टेलीविजन चैनल-परामर्श

केन्द्रीय सूचना अउ प्रसारण मंत्रालय ह जम्मां प्राईवेट सैटेलाईट टेलीविजन चैनल मन ल परामर्स जारी करके किहीन कि ओमन आपदा अउ दुर्घटना मनके वीडियो ल तारीख अउ दिन के संग देखाय। ए सुझाव म केहे गेहे कि जब कोनों भी प्राकृतिक आपदा आथे, तब टेलीविजन चैनल मन डहार ले कई दिन तक लगातार खबर मन ल चलावत रहिथे, जेखर ले अनावश्यक रूप ले भ्रम के स्थिति पैदा हो जथे।

संक्षिप्त समाचार

– रईपुर के इंदिरा गांधी कृषि विश्वविद्यालय ले संबद्ध उनचालीस ठन सरकारी अउ प्राईवेट कॉलेज मन ल चालू शैक्षणिक सत्र म बीएससी कृषि स्नातक पाठ्यक्रम म नवा शिक्षा नीति के तहत दाखिला खातिर ऑनलाइन काउंसलिंग सुरु करे गेहे। अभ्यर्थी मन ले पन्द्रह अगस्त तक ऑनलाइन आवेदन मंगाय गेहे।

– चिकित्सा शिक्षा विभाग डहार ले राज्य के सरकारी अउ प्राईवेट चिकित्सा के संगेसंग दंत चिकित्सा कॉलेज मनके स्नातक पाठ्यक्रम के काउंसलिंग प्रक्रिया ल वेबसाइट म प्रकाशित कर दे गेहे।

– जांजगीर-चांपा जिला के पुटपुरा गांव म मिडिल स्कूल के छत के प्लास्टर गिरे ले पांच इन लइका मन ल चोट आय हे। ए लइका मन ल जिला अस्पताल म भर्ती कराय गेहे।

– बलौदाबाजार-भाटापारा जिला के कोसमंदी अउ गातापारा गांव के बीच म बाईस ठन गाय के लास बरामद करे गेहे। पुलिस ह जांच सुरु कर देहे।

\*\*\*\*\*  
\*\*\*\*\*